

Priključak na struju za svakog



James Lynch, predstavnik UNHCR-a u BiH i Peter Bas Backer, viši zamjenik visokog predstavnika OHR-a, danas su posjetili sela u općinama Zvornik i Sapna, gdje su se susreli sa povratnicima čiji su domovi bez struje još otkada su se u njih vratili. Povratak na ovo područje je započeo 2000. godine.

Danas su se predstavnik UNHCR-a i viši zamjenik visokog predstavnika OHR-a sastali sa povratnicima, predstvincima lokalnih vlasti i rukovodstvom elektrodistribucija sa ciljem da iznađu rješenje za one koji već šest godina žive bez struje.

“Proces povratka više nije pitanje dobre volje koju pokazuju donatori, nego je to socijalno pitanje koje su dužni razriješiti bh. organi”, izjavio je danas viši zamjenik visokog predstavnika OHR-a. “Vlasti u BiH moraju mobilizirati vlastita sredstva kako bi obnovili infrastrukturu neophodnu za normalan život i pomogli onim ljudima koji su imali hrabrosti da se vrate u jako otežane okolnosti.”

Sela Gornja Kamenica, Đulići, Radava i Rastonica, koja su danas posjetili predstavnik UNHCR-a i viši zamjenik visokog predstavnika OHR-a, samo su neka od mnogih povratničkih lokacija u zemlji gdje se održivost povratka dovodi u pitanje zbog nedostatka infrastrukture neophodne za snabdijevanje električnom energijom.

“Neprihvatljivo je da jedanaest godina nakon potpisivanja “Dejtonskog mirovnog sporazuma”, u zemlji koja se nalazi na pragu ugovornih odnosa sa Evropskom unijom, ovi ljudi još vijek nemaju pristup osnovnim uslugama”, izjavio je predstavnik UNHCR-a, James Lynch. “Nadam se da su dužnosnici sa ovog područja prepoznali da su oni odgovorni za ovo pitanje.”

Peter Bas Backer i James Lynch su iskazali nadu da će ova područja uskoro biti snabdjevena strujom. “Svjedoci smo pozitivnih dešavanja u Strgačini koja se nalazi u sličnoj situaciji”, rekao je predstavnik UNHCR-a.